

17. november

Apeqquteqaat aallaavigalugu oqallinnissamik siunnersuut: Qanoq ililluta ineqarnermut aningaasat immikkoortinneqarsimasut atorluarneqarsinnaaneri qulakkeersinnaavagut?
(inatsisartunut ilaasortaq, Anthon Frederiksen, Partii Naleraq)

Inatsisartunut ilaasortap, Anthon Frederiksen, Partii Naleraq oqallisissiaanut Siumumiit imaattumik oqaaseqassuugut.

Siumumiit oqaatigisuartagarput tassaavoq kikkulluunniit qanoq isertitaqarneq apeqqutaatinnagu akilersinnaasaminnik peqqinnartumillu ineqarnissamut periarfissaqartariqartut.

2012-mi ineqarneq pillugu naalackersuinikkut ingerlatsinermut nassuiaat inatsisartunut saqqummiunneqarpoq. Saqqummiussaq partiinik tamanit oqaaseqarfigineqarsimanera takungaanni oqartariaqarpoq ullumikkoorniit annertunerujussuarmik ineqarnermut tunngatillugu aningaasat atornerqartut agguataagaaneri pillugit oqallittoqartariaqartoq.

Upernaaq politikkerit atorfilittallu ineqarneq pillugu isumasioqatigiisinnerqarput. Tamatuma kinguneranik isumaqatigiippugut isumasioqatigiinneq malitseqartinneqassasoq siammasinnerujussuarmik peqataaffigineqartumik. Tamanna soorunami qilanaarluta utaqqivarput.

Oqallisissiamik saqqummiisup allassimasai takungaanni najugaqarnermut tapissutit 300 milliunuit koruunit missai inissianut taarsigassarsianut erniaqanngittunut iluaquusiissutaasarsimapput. Tapiissutaasartut eqqarsaatigalugit aningaasat taaneqartut taakkuinnaagunangillat. Oqallisissiaqartullu apeqqutinnngortitsilluni oqallisissiaata qulequtaa takungaanni assortoruminaattoq oqaatigisariaqarpoq.

Aamma namminerisaminnik initaarniartunut pisortat tapiissutigisartangai kisiisa pinnagit, aammali pisortat inissiaataasa attartortittakkat aningaasarpassuarnik tapiivigineqartariaqartarnerat eqqarsaatigalugu nalilersueqqinneq pisariaqalerpoq.

Pingaartumik inissiat attartortittakkat pisortanit pigineqartut ima akisutigipput attartortut amerlanerpaat tamakkiisumik akilersinnaanngimmatsigit attartortitsisutut tapiissuteqarfigisarlugit. Taak-kunanilu illuatungaatigut akiliisinnaassuseqalaartunnguit ilungersortitaralutigit aqqissuussaanitsinnik tunngaveqartumik eqqaamiuminnut pilliuteqaqataanissamik pisussaaffeqartikkatsigit nalunatigu.

Periuseq 20-20-60 atorlugu illuliortarneq tapersersortuaratsigu Siumumiit oqaatigerusupparput, kaammattuutigiinnarusullutigulu inoqarfinnut amerlanerusunik periarfissap taassuma siammarternissaata periarfissarsiuunneqarnissaa. Tassungalu atatillugu Illorput 2000 aamma Illorput 2100-p nunarput tamakkerlugu sanaartorneqarsinnaasunngorlugit periarfissiinissaq Siumumiit Naalackersuisunut isumageqqussavarput, aammalu illutaarniartup nammineq akiligassai pillugit naatsor-sueriaatsip aningaasarsiorluartunut pillaatitut pinnagu naleqqussaavigigineqarnissaa suliareqqussavarput. **Aammalu nunarput tamakkerlugu sanaartornerup inuiaqatigiit aningaasaqarnerannut iluaqutaanerusunngortinnissaa Naalackersuisut aqqutissiuuttariaqarpaat.**

Siumup inissiat akiisa qaffattaaliornissaannik isumaqartuarnera assuarliutaasarnikuvoq. Tamanna suli aalajagusimavarput. Isumaqartuarpugummi naapertuilluartumik akilersuisitsisoqanngitsoq. Soorlumi aamma siuliani oqaatigigipput attartortillugillu akilersorlugillu. Taamaammatt aamma oqartariaqarpugut inissiat pisoqaassusaat angissusaallu eqqarsaatigalugit akigititatigut annertussu-silersueriaaseq nalilersoqqittariaqartoq.

Aningaasat immikkoortinneqartartut tamakkiisumik ilumut atorfissaminnut tutsinneqartarnerpat? Aningaasanit illuliortiternermut immikkoortinneqartartunit aningaasat qanormita annertutigisumi allaffissornermut "tutsinneqartarpat?".

Naalakkersuisooqatigiit ineqarneq pillugu aqqissuusseqqinnissaq siunniutereeraluaraat qanortoq manna ineqarnernut aningaasat atortakkatta naapertuilluartumik atorneqartalernissaannut suliaqalernissamut aallarniutaali.

Taamatut oqaaseqarluta Siumumiit oqalliseqataanissatsinnut qilanaarpugut.

Jess Svane
Siumut